

## IBENDERA RIBAKOZEHO

- >
- > Abasore batandatu biga mu ishuri rikuru ry'
- > ubuhinzi n'ubworozi (ISAE) kuva mu cyumweru gishize ku
- > wa 24 Mutarama 2002 ku gicamunsi bacumbikiwe muri
- > gereza nkuru ya Kigali (1930) bazira ko baba
- > barasuzuguye ndetse bagatuka ibendera rishya ry'u
- > Rwanda.
- >
- > Gakwaya Léonard, Innocent, Fidèle, Mafaranga Pierre
- > Célestin, na bagenzi babo babiri Umuseso utashoboye
- > kumenya amazina bari mu mwaka wa mbere wa ririya shuri
- > rikorera i Rubirizi ho mu nkengeri z'umugi wa Kigali.
- > Ifatwa n'ifungwa rya bariya basore mo muri Kaminuza
- > byemejwe kuri telefoni n'umuyobozi wa ISAE,
- > bishimangirwa na Secrétaire d'Etat muri Ministeri
- > y'Uburuzi Bwana Jean Damascène Ntawukuriryayo mu
- > kiganiro bagiranye n'Umuseso mu mpera z'icyumweru
- > gishize.
- >
- > "Basuzuguye ibendera ry'igihugu", akaba ari Secrétaire
- > d'Etat Ntawukuriryayo yatangariye Umuseso, asobanura
- > ko bariya banyeshuri ba ISAE begereye ibendera rishya
- > ry'u Rwanda barifataho ngo batangira kuvuga ko ritari
- > iryabo, "maze baririmba indirimbo yubahiriza igihugu
- > yakuweho". Bwana Ruboneka uyobora ISAE we yavuze ko
- > Gakwaya Léonard na bagenzi be bakoze icyaha cyo gutuka
- > ibendera, ngo bakaba baravuze ko nta cyo rimaze. Ibyo
- > ngo byabaye kuwa 11 Mutarama 2002 mu ma saa saba
- > z'amanywa abayobozi b'ishuri badahari, Secrétaire
- > d'Etat ndese na Bwana Ruboneka bombi bakaba bavugaga ko
- > batazi uburyo inzego zishinzwe umutekano zahurujwe
- > zikaza gufata abanyeshuri mu kigo. "Services za
- > Sécurité zabaye informés, nanjye sinzi uwaba
- > yarabiziye", iki kikaba ari igisubizo cya Ruboneka,
- > wongeyeho ko bariya banyeshuri batuka ibendera byari
- > mu gihe abantu bari mu kiruhuko cy'i saa sita nta wari
- > ubari iruhande. Bamaze gufatwa kuwa 17 Mutarama 2002
- > bafungirwe kuri "Special Intelligence" i Gikondo (aho
- > bakunze kwita kwa Gacinya) bahakurwa nyuma y'icyumweru
- > bamanurwa muri "1930" kuwa 24 Mutarama 2002.
- >
- > Ku kibazo cyo kumenya amaherezo y'abo basore ku
- > bijyanye n'amasomo yabo, Secrétaire d'Etat
- > Ntawukuriryayo yasubije ko nta cyo yabitangazaho, ati:
- > Ikibazo gifitwe na Parquet, niyo ishinze
- > kugikurikirana, ubwo nibaburanishwa bakaba abere
- > bazarekurwa basubire ku murimo wabo, nibahamwa
- > n'icyaha na bwo bazahabwa igihano cyibakwiriyeye."
- >
- > Yongeyeho ko ategereje kugira icyo atangarizwa na
- > Komiseri Mukuru wa Polisi igihe amaperereza azaba
- > yarangiye.
- >
- > Ababyeyi b'abanyeshuri bafunze batangariye Umuseso ko
- > abana babo barengana. Umwe muri bo utarashake ko
- > izina rye ritangazwa yavuze ko ifungwa rya bariya
- > basore ryatewe n'ubwumvikane buke bwari bumaze iminsi
- > buvugwa hagati y'abanyeshuri bigabanyijemo ibice
- > bibiri ngo biherereye ku bigo bizemo amashuri yisumbuye.
- > Haba harigeze kubaho ikopera ry'ikizamini mu minsi
- > ishize noneho itsinda ryitwa "Rushashi" rirabisakuza

- > bituma ikizamini gisubirwamo. Abakopezi ngo barwaye
- > inzika, ku buryo ubwo abashinzwe umutekano bazaba
- > gufata Gakwaya na bagenzi be hifashishijwe iliti
- > yakozwe n'abakopezi ngo ikaba yarashyikirijwe
- > ubuyobozi bw'ishuri. Ngo bazaga bafata umwe umwe
- > bakagenda banaga mu modoka. Haba hari umunyeshuri
- > wahatiriwe kujya gushinja bariya bagenzi be, ngo
- > igikundi cy'abakopezi kikaba cyaramukangishije
- > kumushyirishamo na we niba atemeye gushinja. Ifungwa
- > ry'aba banyeshuri kandi bivugwa ko hari umuntu wo mu
- > nzego nkuru z'ubuyobozi wabigizemo uruhare, uyu akaba
- > afite umwana w'umukopezi. Umuvugizi wa Polisi Tony
- > Kuramba yatangariye Umuseso ko inkuru y'ifatwa
- > n'ifungwa rya bariya banyeshuri atari abizi, yongeyeho
- > ko yari amaze iminsi adakora kubera uburwayi.
- >
- > Abanyeshuri ba ISAE si bo ba mbere bafungishijwe
- > n'ibendera rishya ry'u Rwanda. Bukeye rizamuwe bwa
- > mbere, uwitwa Karinda Stuart yashatse kurimanura ku
- > muhanda ngo agira ngo aritunge iwe mu rugo, Local
- > Defense ihita imukacira. Yarekuwe hashize ibyumweru
- > bitatu. Bamwe rero bagiye bacumura bitewe n'urukundo
- > ry'ibishya, abandi ubujiji, bakaba na za mayibobo
- > zagiye zimanura ariya mabendera yari yashyizwe ku
- > muhanda zikayatwara, nta wamenya aho zayashyize.
- >
- > Hari abantu banyuranye bagiye batanga ibitekerezo ku
- > birango bishya n'indirimbo nshya yubahiriza igihugu,
- > hakaba habonekamo abatavuga rumwe na Leta bagwiriye mu
- > bihugu by'i Burayi n'Amerika.
- >
- > Par Ismaïl Mbonigaba.-